

یوہ آکاشوانی جموں ہے محمد اکرم تیں خبر سنو۔

ISRO

بھارت غوپہلو امیجنگ سیٹلائٹ جیو سنکرونس مداد مانہ کامیابی غے نال پُجا دتو گیو ہے۔ اس نانہ اج صبح سویرے سری ہری کوٹا غا ستیش دھون خلائی مرکز تیں جی ایس ایل وی راکٹ غے ذریعے لانچ کیو گیو۔ ایسرو غے مطابق، جدید ٹیکنالوجی تیں لیس ارتھ آبرویشن سیٹلائٹ ای او ایس 05 نانہ کامیابی غے نال سب جیو سنکرونس مداد مانہ کامیابی غے نال پُجایو گیو۔ یوہ امیجنگ سیٹلائٹ حقیقی وقت غی تصویر فراہم کرے غو تے زراعت تے قدرتی آفات تیں نمٹن سمیت بکھ بکھ شعباں مانہ ملک غی مدد کرے غو۔

PM ISRO

اسے دوران، وزیر اعظم نریندر مودی نے سیٹلائٹ غی کامیاب لانچنگ ور خوشی غو اظہار کیو ہے۔ انہاں نے کہو کہ یہ کامیابی بھارت غا خلائی شعبہ غی بہترین کارکردگی، جدت تے بدھتی وی صلاحیتاں غی عکاسی کرے۔ سماجی میڈیا ور ایک پوسٹ مانہ جناب مودی نے اس نانہ ایسرو غی ایک شاندار کامیابی تے ملک واسطے فخر غو لمحو قرار دتو۔

MASTER PLAN

وزیر اعلیٰ عمر عبداللہ نے سرینگر مانہ جموں ترقیاتی اتھارٹی تے سرینگر ترقیاتی اتھارٹی غا بورڈ آف ڈائریکٹرز غا اجلاس غی صدارت کی۔ جے ڈی اے غو یوہ 91 ویں جد کہ ایس ڈی اے غو یوہ 85 ووں، بورڈ اجلاس تھو۔ اجلاس غے دوران وزیر اعلیٰ نے جموں تے سرینگر غا شہری منصوبہ بند تے پائیدار شہری ترقی تیں متعلق اہم اقدامات غو جائیزو لیو۔ اجلاس مانہ دواں دارلحکومت شہراں مانہ بنیادی ڈھانچہ نانہ بہتر بنان تے لوکاں واسطے زندگی نانہ آسان بنان ور توجہ دتی گئی۔ اس تیں علاوہ گزشتہ بورڈ اجلاس مانہ لیا گیا فیصلاں ور عمل درآمد غی صورتحال گو وی جائیزو لیو گیو تے شہری بنیادی ڈھانچہ غی ترقی تیں متعلق بکھ بکھ معاملات ور غور کیو گیو۔

INTRUDER

جموں غا کنہ چک سیکٹر مانہ کل بین الاقوامی سرحد غے قریب سرحدی حفاظتی دستہ نے ایک پاکستانی درانداز نانہ گرفتار کیو۔ آکاشوانی جموں گا نمائندہ غے مطابق، 44 بٹالین بی ایس ایف غا اہلکاراں نے سویرے غے وقت، سرحدی غی اگلی چوکی، سوہن غے قریب اس شخص نانہ گرفتار کیو۔ گرفتاری تیں بعد اس نانہ بی ایس ایف غی حراست مانہ لیو گیو۔ اس دوران اعلیٰ حکام وی اُت پُجیا تے صورتحال غو جائیزو لیو گیو۔

MAHORE RECOVERY

حفاظتی دستہ نے کل جموں کشمیر غا ریاسی ضلع مانہ تلاشی کاروائی غے دوران ہتھیاراں غو ایک زخیرو برآمد کیو۔ حکام غے مطابق، اس مانہ ایک پستول، ایک گرنیڈ تے 184 گولیں شامل ہیں۔ ریاسی تیں آکاشوانی غا مارا نمائندہ نے حکام غا حوالہ تیں دسیو کہ مخصوص اطلاع ملن ور ریاسی ضلع غا مہور علاقہ مانہ کھٹاجی راج غا گھنہ جنگلات مانہ تلاشی کاروائی کی گئی۔ کاروائی غے دوران فورسز، نے جنگی نوعیت غو سامان برآمد کیو ہے، جس مانہ اے کے 47 رائفل غی 140 گولیں، پیکا مشین گن غی 19 گولیں، پستول غی 25 گولیں، ایک گرنیڈ، 6 کیسیٹس تے ایک اے کے میگزین شامل ہیں۔ حکام نے دسیو کہ اس برآمد غی غا سلسلہ مانہ مزید تحقیقات شروع کردتی گئی ہیں۔

JANAMASHTMI

بھگوان کرشن غی پیدائش گا موقع ور جنماشٹمی غو تہوار اج پورا ملک غے نال نال جموں خطہ مانہ وی مزہبی جوش و خروش نال مناہو جارہو ہے۔ اس موقعہ ور عقیدت مند ورت رکھیں۔ مندران مانہ جیں تے مزہبی تقریب کریں۔ کہراں نانہ مندران نانہ اس طور سجایو گیو ہے۔ جس نال کرشن بھگوان غی زندگی افساط غی عکاسی کی گئی ہے۔ جس راہ گوگل تے ورندا ون مانہ اُن غو بچپن تھو۔ جموں مانہ بازاراں مانہ رنگ برنگی سجاوٹ نال خوبصورت بناہو گیو ہے۔ جس نال بازاراں نانہ ایک تہوار گو منظر مل رہو ہے۔ دکاناں مانہ کافی بھیڑ دیکھی

جاری ہے کیونجے لوک بھگوان کرشن غی مورتیاں ، روایتی لباس ، سجاوٹی سامان، مٹھائی تے دیگر ضروری سامان خرید رہیا ہیں ۔ بکھ بکھ ضلعی انتظاماں تے پولیس نے علاقہ گا حساس مقامات ور چوکیاں تے گشت سمیت وسیع حفاظتی انتظامات کیا ہیں۔

PREZ-PM-LG-CM GREETINGS

صدر جمہوریہ دروپری مرمو نے جنم اشٹمی ور شہریاں نانہہ مبارک باد پیش کی ہے۔ اپنا پیغام مانہہ صدر جمہوریہ نے کہیو کہ بھگوان کرشن غی زندگی تے تعلیمات نے بھارت گا ثقافتی تے فلسفانہ ورثہ مانہہ نویں جان پائی ہے وزیر اعظم نریندر مودی نے وی کرشن بھگوان گا جنم تہاڑا ور مبارک باد دتی ہے ۔ ایکس ور ایک پیغام مانہہ جناب مودی نے کہی و کہ بھگون شری کرشن غی تعلیمات بے لوٹ عمل غی ترغیب دے تے زماناں توں انسانیت غی رہنمائی کرے۔ اس موقع ور لیفٹیننٹ گورنر منوج سنہا تے وزیر اعلیٰ عمر عبداللہ نے وی جنم اشٹمی گا مبارک موقع ور عوام نانہہ مبارک باد پیش کی ہے۔

NEWS READ BY MOHD AKRAM
NEWS EDITOR MANOJ DOGRA
DEO NUSRAT
SKILLED RAJAT
TECH ASST QUDRAT